



18

Ipar Euskal Herriko hemezortzi herritan burutu dute bigarren itzulia: Aldude, Amendüze, Azkaine, Baiona, Bidaxune, Bildoze, Bokale, Miarritze, Hendaia, Itsasu, Landibarre, Larraine, Maule, Senpere, Urketa, Urruña, Uztaritze eta Ziburu.

Mikel Hiribarren Itsasuko auzapeza:

“Zoritxarrez joan den asteko auziak eta botere politikoen dorpetasunak behartu dute Mikel Barrios presondegira joatea. Itsasukoa da eta gure elkartasun osoa helarazten diogu”.

Abstentzioa

Abstentzio handia izan da hauteskundeetan bigarren itzuli honetan ere. Besteak beste, %56,7koa izan da Baionan, %41,5koa Ziburun eta %52,9koa Hendaian.

Hala ere, lehen itzulian baino bozkatzaile gehiago izan da. Koronabirusak eragindako egoerari lotu zaio parte hartze apala.



ENeko ALDANA Ziburuko auzapez berria, bere aitarekin.

Xinaurri lanaren uzta

JENOFA BERTHOKOIRIGOIN

Bigarren itzuli honetan ere urtetako lanaren emaitza lortu dute abertzale ezkertiarrek: Ziburun, Urruñan eta Itsasun auzapez izango dira. Bozketen lehen itzulian Biriatur eta Donapaleun irabazirik, Uztaritzen eta Baigorri 2014ko garaipen historikoa berri ere errepikaturik, luzatuz doa abertzale eta ezkertiarrek kudeatu herri ertain-handien zerrenda. 1960. hamarkadan sorturiko mugimendu abertzaleak bide handia egin du denbora laburrean: aurkariak baztertu eta gogorki trataturiko *Enbata zikina* izatetik, politika jokalekuko eragile nagusi izatera heldu dira. Lehenik herri ttipietan, baserri munduan eta geroz eta gehiago hirietan ere. Agintaldiz agintaldi, oposizioetik eta lurretik egin xinaurri lanaren emaitza dute ziburutar, urruñar zein itsasuarrek, duda gabe. Poz handiz garaipena ospaturik, kanpainan plazaratu alternatibaren mezua gauzatzeko lanari lotu beharko dira gaurdanik, hots, xinaurri lanarekin segitu beharko dute. Tartean, nola ez, etxebizitzaren arazoari begira jarritik –batez ere bigarren etxebizitzaren gaia Urruñan eta Ziburun eta hiri-gintzak dakarren laborantza lurren desagerpena Itsasun–, herriko etxeen politika norabidez aldatzeko betebeharra dute. Beste zerrenda bati juntaturik, gehiengoan kokatzea lortu dute Hendaian eta Senperen. Eta oposizioan gelditzen badira ere, emaitza hobeak lortu dituzte Maulen, Miarritzen eta Azkainen.

Ekainaren 28ko bozketen beste elementu inportantea izan da Baionakoa, orain arteko auzapez Jean-Rene Etxegaraik lortu garaipen argia. Botoen %46,19 lorturik, bigarren gelditu da Henri Etxeto ezkertiarra. Honek duen jarrera antieuskaldun eta jakobinoak eragin du parte handi batean, BBE Baiona Berde eta Elkarkidea bigarren itzulian hari juntatu ahal ez izana eta abertzale ezkertiar guttik beretzat bozkatu izana. Azken aldietan “zerrenda abertzaleak” baino “kide abertzaleak dituzten zerrenda irekiak” osatu dituzte eta elkarlan horren fruitua da auzapez abertzaleen zerrendaren luzatzea. Baina Baionak argi utzi du guztiak ezkerrekoak izanda ere elkarlana eta errespetua bi aldeetarik behar dela, aliantzak posible bilakarakazteko. Lehen itzulian botoen %13,12 egin zuen BBEx bigarren itzulian bakarrik ez aurkeztea erabakirik, hautetsi abertzale eta ezkertiarrik ez da egonen ondoko sei urteetan Lapurdiko hiriburuan. Aipatzekoa da Zuberoako hiriburua ezkerre berriz itzuli dela. Botoen %38,24 bildurik, auzapezaren aulkia galdu du Mixel Etxebestek eta Louis Labadot komunista jakobinoak izanen du ardura %40,34 lorturik –Beñat Elkegarai abertzale ezkertiarrek bozen %21,41 eskuratu du, 2014ko emaitza hobetuta, herriko kontseiluan aulki batetarik bitara pasaz eta beraz, xinaurri lanean segitzeko indar gehiago bilduz–. Azken elementu bat emaitzak analizatzeko: Maulen izan ezik, abstentzioa handia izan da berriro ere hauteskunde hauetan.

Herriko etxeen osaketak argiturik, orain Euskal Hirigune Elkargokoarena dator. Uztailaren 17an aukeratuko dute lehendakaria. ●